

Immiaaqqat aalakoornartortaqanngitsut eqqunneqarsinnaaleqqullugit nioqqutaalersinnaaqqullugillu immiaaqqat imeruersaatillu puui pillugit nalunaarummut (Immiaaqqat imeruersaatillu kulsyrimik akullit puui pillugit Namminersornerullutik Oqartussat nalunaarutaannut nr. 16, 28. maj 2002-imeersumut) ilaajunnaarseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut
(Inatsisartuni ilaasortaq Justus Hansen, Demokraatit)

Akissuteqaat

(Pinnngortitamut, Avatangiisinut Ilisimatusarnermullu Naalakkersuisoq)

Siullermeerneqarnera

Naalakkersuisuniit Inatsisartut aalajangiiffigisassaattut siunnersuummut saqqummiunneqartumut qujavugut.

Atuisut immiaaqqanik aalakoornartortaqanngitsunik pissarsisinnaanerisa pingaaruteqarnera pillugu Naalakkersuisut siunnersuuteqartoq isumaqatigaat, tunisassiaq taanna immiaaqqamit aalakoornartortalimmit peqqinnarnerummat. Pingaartumik ilaqtariit meerartallit immiaaqqanik aalakoornartortaqanngitsunik piumasartut, kiisalu atuisut immiaaqqanik aalakoornartortaqanngitsunik toqqaasinnaatillugit tamanna angallannermi isumannaassutsimut iluaqutaasorujussusoq nunani allani misilittakkat takutippaat. Taamaattumik immiaaqqat aalakoornartortaqanngitsut atuisartunit kalaallinit pissarsiarineqarsinnaalernissaat pingaaruteqarmat, Naalakkersuisut siunnersuuteqartoq isumaqatigaat.

Immiaaqqanik aalakoornartortaqanngitsunik eqqussisarnermi tuniniaasarnermilu ullumikkut “immiaaqqat imeruersaatillu kulsyrimik akullit puui pillugit Namminersornerullutik Oqartussat nalunaarutaat nr. 16, 28. maj 2002-meersoq” tunngavigineqarpoq. Poortuutissanut nalunaarummi §§ 1 aamma 2 naapertorlugit immiaaqqat imeruersaatillu kulsyrimik akullit taamaallaat utertittakkanik, nalunaarummut ilanngussami nassuiaatigineqartunut naammassinniffiusunik pooqartillugit tuniniarneqarsinnaapput sassaalliutigineqarsinnaallutillu. Kalaallit Nunaata Avannaani Tunumilu immiaaqqat imeruersaatillu kulsyrimik akullit, poortuutissanik ataasiaannarlugit atorineqartartunik utertitsisarnermi Naalakkersuisunit akuerineqartumi utertinneqarsinnaasunik puullit tuniniarneqarsinnaapput sassaalliutigineqarsinnaallutillu. Tassalu poortuutissanut nalunaarummi immiaaqqat aalakoornartortaqanngitsut aalakoornartortallillu akornanni immikkoortitsisoqanngilaq. Taamaattumik poortuutissanut nalunaarummi naapertorlugu tunisassiat taamaattut poortuutissanut nalunaarummi piumasaqaatit malillugit tuniniarneqarpata, immiaaqqanik aalakoornartortaqanngitsunik amerlasuukkaaraluni tuniniaanissaq akornusersimaneqanngilaq.

Kisiannili immiaaqqat aalakoornartortaqanngitsut ullumikkut piumaneqarnerat ima killeqartigaaq, immiaaqqanik aalakoornartortaqanngitsunik puukut utertittakkat akuerisat atorlugit maqitsinissaq maannamut imminut akilersinnaanani, taamaattumillu immiaaqqat aalakoornartortaqanngitsut nunatsinni maqinneqarneq ajorput. Tamanna peqqutigalugu poortuutissanut nalunaarutip allannngortinneqarnissaa Naalakkersuisut pisariaqartippaat,

taamaalilluni immiaaqqat aalakoornartortaqaanngitsut allanik, soorlu qillertuusanik pooqarlutik tikisinneqarsinnaalissammata tunineqarsinnaalissallutillu.

Aalajangiiffigisassatut siunnersuut akuerineqassappat, poortuutissanut nalunaarutip allanngortinneqassaaq, taamaalillunilu immiaaqqat aalakoornartortaqaanngitsut poortuutissat utertitsisarnermut ilaanissaannik piumasaaqatitaqaanngitsumik qanorluunniit ittunik pooqarlutik tuniniarneqarsinnaalissallutik. Tamatuma peqatigisaanik siunissami utertitsisarnermik, aammattaaq imeruusaatinik qillertuusaniittunik isumaginniffiusinnaasumik pilersitsinissamut periarfissat Naalakkersuisunit misissorneqassapput.

Tamassumanilu Naalakkersuisut ukiuni kingullerni utertitsisarnermik pioreersumik aammalu utertitsisarnermik nutaamik pilersitsinissamut periarfissanik misissuinerit arlalinnik ingerlataqarsimapput. Misissuinerit taakku naammassineqarpata, poortuutissanut nalunaarut tamakkerluni iluarsaanneqassanersoq, taamaalillunilu imeruusaatit kulysritallit utertittakkanik ataasiaannarlunilu atortakkanik assigiinngitsunik, soorlu qillertuusanik pooqarlutik tuniniarneqarsinnaalissanersut Naalakkersuisunit misissorneqassaaq. Naalakkersuisut utertitsisarnermik nutaamik atulersitsiniarlutik aalajangiippata, aamma inuussutissarsiutinik ingerlataqartut utertitsisarnermik nutaamik pilersitsinissamut allannguinissamullu periarfissaqartillugit piffissaliisoqassaaq, taamaalillunilu puukunik pinngortitamut eqqaanissaq pinngitsoortinneqassalluni.

Naalakkersuisuniit taamatut oqaaseqarluta siunnersuut akuerineqassasoq inassutigaarput, atuisut immiaaqqanik aalakoornartortaqaanngitsunik, pissarsisinnaanissaasa naapertuunneranut Naalakkersuisut isumaqataammata.